



**NOGOMETNI / FUDBALSKI SAVEZ
BOSNE I HERCEGOVINE**

PROPOZICIJE
takmičenja Premijer ženske lige BiH
i završnog dijela Kup-a BiH za žene
za takmičarsku sezonu 2023/24.

Maj/Svibanj 2023. godine

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 17.05.2023. godine u Zenici, d o n o s i

PROPOZICIJE **takmičenja Premijer ženske lige BiH** **za takmičarsku sezonu 2023/24.**

OPŠTE ODREDBE

Član 1.

Ovim Propozicijama utvrđuje se način organizovanja i provođenja takmičenja Premijer ženske lige BiH u takmičarskoj sezoni 2023/24.

UČESNICI TAKMIČENJA

Član 2.

Premijer ženska liga BiH broji 8 klubova i to:

- Šest prvoplasiranih klubova Premijer ženske lige BiH za takmičarsku sezonu 2022/23,
- Prvoplasirani klub iz Prve ženske lige FS RS na kraju takmičarske sezone 2022/23,
- Prvoplasirani klub iz Prve ženske lige NS FBiH na kraju takmičarske sezone 2022/23.

Na kraju takmičarske sezone 2023/24. godine iz Premijer ženske lige BiH ispadaju dva najslabije plasirana kluba.

Svi klubovi koji učestvuju u takmičenju moraju imati i odgovarajuću „U-17“ selekciju koja učestvuje u paralelnom takmičenju na nivou NS/FS BiH. Klub koji nema pomenutu selekciju, ne može nastupati u Premijer ženskoj ligi BiH, a umjesto njega nastupa klub koji je zauzeo prethodno mjesto na tabeli PŽL BiH nakon završetka takmičarske sezone 2022/23.

Popuna Premijer ženske lige BiH vrši se sa prvoplasiranim klubovima iz Prvih ženskih liga Nogometnog saveza Federacije BiH i Fudbalskog saveza Republike Srpske.

ORGANIZACIJA TAKMIČENJA

Član 3.

Takmičenjem u Premijer ženskoj ligi BiH rukovodi Komitet za takmičenje NS/FS BiH (u daljem tekstu Komitet), u saradnji sa Službom za takmičenje i suđenje NS/FS BiH.

Član 4.

Takmičenje u Premijer ženskoj ligi se odvija po trokružnom bod sistemu u dva dijela, a prema kalendaru takmičenja koji donosi Izvršni odbor NS/FS BiH, na prijedlog Komiteta.

PRVI DIO:

Dvokružno (7+7 = 14 kola), a raspored utakmica određuje se žrijebom takmičarskih brojeva, uz primjenu Bergerove tablice.

DRUGI DIO:

U drugom dijelu nastavka takmičenja (dodatnih 6 kola), na osnovu utvrđenih rezultata iz jedinstvene tabele prvog dijela vrši se formiranje dvije lige od po 4 kluba, zavisno od plasmana na konačnoj tabeli prvog dijela, i to Liga za prvaka i Liga za opstanak.

Ligu za prvaka formiraju klubovi, kao grupnu fazu, koji su ostvarili takmičarski rezultat (redosljed) od 1. do 4. mjesta na konačnoj tabeli nakon završetka prvog dijela takmičenja.

Liga za opstanak formiraju klubovi koji su ostvarili takmičarski rezultat (redosljed) od 5. do 8. mjesta na konačnoj tabeli nakon završetka prvog dijela takmičenja.

Klubovi koji su nastavili takmičenje u grupnoj fazi kroz Ligu za prvaka i Ligu za opstanak, prenose sve svoje takmičarske rezultate i disciplinske mjere iz jedinstvene konačne tabele prvog dijela prvenstva kao polaznu osnovu za nastavak takmičenja u grupnoj fazi takmičenja.

Ukoliko dva ili više klubova (ekipa) imaju isti broj bodova na mjestima jedinstvene konačne tabele koja obezbjeđuje takmičenje u Ligi za prvaka i Ligi za opstanak, plasman se određuje na osnovu dodatne pomoćne tabele a na osnovu rezultata koje su u međusobnim susretima ostvarili klubovi sa jednakim brojem bodova. Plasman na dodatnoj pomoćnoj tabeli utvrđuje se zbirom osvojenih bodova, osvojenih u oba dijela prvenstva.

Ako je zbir osvojenih bodova jednak, odlučuje razlika između datih i primljenih pogodaka/golova. Ako je razlika i tu jednaka odlučuje veći broj postignutih pogodaka/golova, a ako je i to jednako odlučuje ukupna gol razlika u prvom dijelu takmičenja svih klubova (ekipa), ako je i to isto odlučuje se žrijebom.

Raspored drugog dijela takmičenja po ligama, utvrđuje se posebno za svaku ligu na osnovu utvrđenih rezultata klubova iz tabele i mjesta na kome se nalazi klub u formiranoj ligi, uz primjenu Bergerovih tablica, gdje je svaki klub u ligi jednom domaćin i jednom gost, u skladu sa Kalendarom takmičenja NS/FS BiH za takmičarsku godinu.

Odluku o izmjenama, od strane Izvršnog odbora NS/FS BiH usvojenog kalendara takmičenja, u slučaju vanrednih okolnosti (vanrednog stanja, stanja elemetarne nepogode, promjena u kalendaru međunarodnih takmičenja/natjecanja ili drugih odluka FIFA-e i UEFA-e), donosi Komitet, u saradnji sa Službom za takmičenje i suđenje NS/FS BiH.

Član 5.

Utakmice se igraju u dva dijela po 45 minuta. Odmor između dva dijela igre traje minimalno 10, a maksimalno 15 minuta.

Član 6.

Klubovi su obavezni da najkasnije u roku od 10 dana prije termina žrijeba dostave u Službu za takmičenje i suđenje NS/FS BiH slijedeće informacije:

- naziv stadiona i alternativnog stadiona na kome će igrati utakmice;
- mjesto i vrijeme odigravanje utakmica (subota-nedelja);
- boju opreme (šorc, majica i dokoljenice) i rezervnu boju sa kojom će klub nastupati.

Igračice Premijer ženske lige BiH obavezne su na lijevom rukavu majice nositi logo takmičenja.

Član 7.

Dva posljednja prvenstvena kola drugog dijela takmičenja igraju se istog dana i u isto vrijeme.

Izuzetno od prethodnog stava, Komitet može utvrditi i drugi termin odigravanja utakmice, samo u slučaju da ista nema rezultatski značaj i ishod iste ne utiče na plasman na tabeli.

PROMJENA TERMINA ODIGRAVANJA UTAKMICA

Član 8.

Promjena termina odigravanja utakmice može se vršiti na osnovu podnesenog pismenog zahtjeva zainteresovanog kluba, koji mora biti podnesen Komitetu najkasnije 8 (osam) dana prije utvrđenog termina odigravanja utakmice, a koji u sebi sadrži razlog zbog kojeg se traži promjena termina s predloženom dokumentacijom, iz koje se može utvrditi opravdanost zahtjeva, kao i eventualni prijedlog za novi termin.

U slučaju kada zahtjev za promjenu termina odigravanja utakmice nije podnesen u predviđenom roku iz stava 1. ovog člana, klub je dužan dostaviti i pismenu saglasnost drugog kluba (protivnika) za

promjenu termina odigravanja utakmice, a najkasnije u roku od 3 (tri) dana od dana utvrđenog termina utakmice.

Klubovi u takmičenju Premijer ženske lige BiH imaju pravo na odlaganje prvenstvene utakmice, ukoliko je iz njihove ekipe pozvano tri (3) ili više seniorskih igračica za sastav seniorske ženske reprezentacije BiH.

Odluku o zahtjevu kluba za promjenu termina utakmice iz stavka 1. i 2. ovog člana donosi Komitet.

Odluka Komiteta je konačna i ona se dostavlja zainteresiranim klubovima i ostalim sudionicima takmičenja.

DUŽNOSTI KLUBOVA

Član 9.

Klub domaćin je obavezan pripremiti teren za igru, a odluku o podobnosti terena za odigravanje utakmice donosi isključivo sudija utakmice.

Utakmice se mogu igrati na stadionima koji imaju saglasnost NS/FS BiH, a odluku donosi Komitet na osnovu izvještaja Ad hoc komisije za pregled stadiona, koju sačinjavaju po jedan predstavnik Komiteta za takmičenje, Komiteta za stadione i bezbjednost, te Generalnog sekretarijata NS/FS BiH.

Član 10.

Klub je obavezan na stadion doći 90 minuta prije utakmice i nastupiti sa najboljim sastavom.

Član 11.

Klub domaćin obavezan je da delegatu utakmice stavi na raspolaganje računar sa internet konekcijom i štampač, te da pruži svu neophodnu pomoć u sastavljanju zapisnika. Takmičenje se administrativno vodi kroz COMET informacioni sistem. Klubovi su dužni da najkasnije 45 minuta prije početka utakmice, dostave delegatu na propisanom obrascu, spisak igrača i službenih lica koja će nastupati na utakmici. Sve osobe, igrači i službena lica, sa dostavljenog propisanog obrasca za utakmicu, moraju biti licencirana od strane NS/FS BiH i registrovana u Comet-u.

U slučaju da sistem Comet nije u funkciji vođenje zapisnika sa utakmice se radi ručno, na za to propisanom obrascu, a naknadno će delegat u sistemu Comet napraviti zapisnik. Ručni zapisnik piše se u četiri primjerka i potpisuju ga delegat, sudija i predstavnici klubova.

Član 12.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije u skladu sa Disciplinskim pravilnikom NS/FS BiH.

Član 13.

Klub domaćin će, na zahtjev gostujućeg kluba, a prema mogućnostima, izvršiti rezervaciju smještaja i ishrane, kao i starati se o njihovom dočeku, boravku i ispraćaju.

Sve troškove iz prethodnog stava snosi gostujuća ekipa, ako drugačije nije predviđeno posebnim sporazumom klubova.

Član 14.

Klub domaćin je dužan da preduzme sve mjere u cilju obezbjeđenja ličnosti: članova gostujuće ekipe i službenih lica prije utakmice, za vrijeme odigravanja utakmice i po završetku utakmice, sve do napuštanja stadiona i mjesta odigravanja utakmice.

Domaći klub je, također, dužan da obezbijedi odgovarajuću dežurnu redarsku službu dovoljnim brojem redara, te prisustvo pripadnika policije, ljekara, vozila hitne pomoći i 2-4 lica sa nosilima, te dovoljan broj sakupljača lopti (najmanje 6).

Klub-domaćin je obavezan nadležnoj policijskoj upravi prijaviti mjesto i vrijeme odigravanja utakmice, te druge relevantne podatke na zahtjev policijske uprave.

Bez pripadnika policije, vozila za hitnu pomoć i ljekara, utakmica se neće igrati.

Za propuste u organizaciji utakmice klubovi će snositi takmičarske i disciplinske posljedice prema važećim propisima NS/FS BiH.

Član 15.

Klub domaćin obavezan je nezavisnoj snimateljskoj kompaniji, koju ovlasti NS/FS BiH, omogućiti adekvatne uslove (na centralnom dijelu stadiona) za snimanje utakmice.

Također, TV kompaniji koja vrši direktni prijenos utakmice, klub je dužan osigurati punu sigurnost za opremu i djelatnike, za vrijeme i nakon završetka utakmice, u objektu stadiona.

Član 16.

Za vrijeme odigravanja prvenstvenih utakmica u stadionu, pored terena za igru, u tehničkom prostoru moraju se nalaziti slijedeća licencirana lica (u ovisnosti da li je klub domaćin ili gost), a u suprotnom klub snosi disciplinske posljedice:

1. predstavnik/ca kluba - prikladno obučen/a (obaveza oba kluba)
2. glavni/a trener/ica - prikladno obučen/a ili u trenerci kluba, koji/a posjeduje najmanje trenersku UEFA B licencu (obaveza oba kluba)
3. najmanje jedna pomoćna/e trenera/ice, u trenerci kluba, koji/a posjeduje najmanje trenersku nacionalnu C licencu (obaveza oba kluba)
4. igrači u sportskoj opremi - u markerima
5. ljekar kluba (obaveza kluba domaćina)
6. fizioterapeut (obaveza oba kluba).

Predstavnik/ica kluba, glavni/a trener/ica ili pomoćni/a trener/ica ne mogu biti ista osoba.

Navedena lica obavezna su posjedovati odgovarajuće validne licence evidentirane u Comet sistemu.

Po završenom procesu licenciranja, službena lica kluba moraju biti registrovana u Comet-u od strane Službe za takmičenje i suđenje NS/FS BiH, odnosno Centra za edukaciju kada su u pitanju treneri.

Validnost evidentiranih licenci i identitet lica mogu kontrolisati samo subjekti koji su ih i izdali i delegat na utakmici. Identitet osoba iz zapisnika utvrđuje se na osnovu fotografije iz Comet-a.

Osobe čiji se identitet ne može utvrditi, nisu registrovane u Comet-u, za funkciju koju obavljaju na utakmici, i/ili im validna licenca nije unešena u Comet, ne mogu se nalaziti u tehničkom prostoru, osim zamjenskih igrača za koje važe odredbe člana 21.

KALENDAR TAKMIČENJA

Član 17.

Raspored odigravanja utakmica se objavljuje putem web stranice, i to najkasnije 15 dana prije početka takmičenja.

Raspored odigravanja utakmica nalazi se u Comet-u i sadrži mjesto igranja, takmičarski par i dan sa satnicom odigravanja utakmica, te obavezuje klubove da u skladu s tim odigraju utakmicu.

Utakmice Premijer ženske lige BiH igraju se subotom i nedjeljom. Utakmice koje se igraju tokom sedmice igraju se srijedom.

Član 18.

U slučaju nastanka štete, odgovoran je klub domaćin, koji oslobađa NS/FS BiH svih zahtjeva za naknadu štete nastalu organizacijom utakmice.

NAJMANJI BROJ IGRAČICA U IGRI

Član 19.

Utakmica ne može da počne ako jedna od ekipa nema najmanje sedam igračica.

Igračice koje nisu upisane do početka utakmice u zapisnik sa utakmice ne mogu nastupiti na utakmici.

Ako jedna od ekipa za vrijeme igre ostane sa manje od sedam igračica, sudija je dužan da zaustavi igru, a ako u roku od pet minuta klub ne nastupi s minimalnim brojem igračica, sudija je dužan da označi kraj utakmice.

Član 20.

Svaka ekipa prijavljuje u zapisnik sa utakmice 18 igračica.

U igri učestvuje 11 prijavljenih igračica, a tokom igre može se izvršiti pet zamjena tokom najviše tri prekida igre (u suprotnom ekipe snose disciplinske sankcije).

Ukoliko neka od ekipa nema u zapisniku utakmice prijavljenih najmanje 15 (petnaest) igračica, onda ista snosi disciplinske posljedice.

Član 21.

Ekipe na jednoj utakmici ne mogu igrati u istim ili sličnim bojama dresova. U protivnom, dresove će promijeniti domaća (prvoimenovana) ekipa.

PRAVO NASTUPA IGRAČICA, LJEKARSKI PREGLED I ČLANARINA

Član 22.

Na prvenstvenim utakmicama mogu nastupiti igračice koje su unesene u Comet sistem i koje su stekle pravo igranja prema odredbama Pravilnika o registracijama klubova i igrača i statusu i transferu igrača NS/FS BIH, ukoliko su navršile 16 godina života, kao i igračice koje navršavaju 16 godina u kalendarskoj godini u kojoj se utakmica odigrava, ali sa obaveznim specijalističkim ljekarskim pregledom kod nadležne zdravstvene ustanove u BiH, kojim se oglašava sposobnim za nastupanje na utakmicama seniorskog uzrasta, pod uslovom da je nadležni registracioni savez unio isti u Comet, na osnovu dokaza o obavljenom specijalističkom ljekarskom pregledu, dostavljenom od strane kluba, sa jasno naznačenim rokom trajanja istog.

Pravo nastupa igračica stranih državljanke regulisano je odredbama Pravilnika o registracijama klubova i igrača i statusu i transferu igrača NS/FS BIH. Klub može imati više registrovanih igračica stranih državljana, s tim što 3 (tri) igračice strane državljanke mogu biti upisane u zapisnik sa utakmice i imaju pravo nastupa na jednoj utakmici.

Igračice sa dvojnim državljanstvom (BiH i neke druge države) ne smatraju se stranim državljanama.

Svaka igračica koja nastupa u takmičenju mora u Comet-u imati unesen period važenja ljekarskog pregleda i period za koji je uplaćena članarina.

Obavljeni ljekarski pregled mora sadržavati obavezujuće elemente koje je propisao Komitet za sportsku medicinu NS/FS BiH.

Za igračicu koji nema upisan važeći ljekarski pregled u Comet -u, delegat utakmice neće dozvoliti nastup na utakmici.

U zapisniku sa utakmice moraju se nalaziti najmanje dvije (2) igračice rođene 01.01.2006. god. ili mlađe, a jedna (1) mora biti sve vrijeme u igri. U suprotnom, klub snosi takmičarske i disciplinske posljedice.

Rok valjanosti ljekarskog pregleda za igračice je šest (6) mjeseci, a za igračice mlađe od 17 godina četiri mjeseca.

Igračica ne može nastupiti na dvije zvanične utakmice u toku istog dana, tj. prije proteka 24 sata od završetka prve utakmice.

Član 23.

Automatsku kaznu zabrane igranja jedne prvenstvene utakmice, nastalu zbog tri žuta kartona, igračica izdržava na prvoj narednoj utakmici, u skladu sa odredbama Disciplinskog pravilnika NS/FS BiH.

Igračica koja je upisana u zapisnik utakmice, smatra se da nije nastupila ukoliko nije ušla u igru.

IDENTITET IGRAČICA

Član 24.

Na prvenstvenim utakmicama mogu nastupiti samo igračice čiji je identitet utvrđen putem fotografije iz Comet sistema, a u slučaju da Comet nije u funkciji, identitet će se utvrditi na osnovu javne isprave: lične karte ili pasoša, odnosno štampane ID Comet kartice. Za igračicu sa neadekvatnom pohranjenom fotografijom u Cometu (kada je nemoguće utvrditi identitet), delegat utakmice neće dozvoliti nastup na utakmici.

Identitet se u pravilu utvrđuje prije početka utakmice.

Za igračice koje su zakasnile na početak utakmice, odnosno na početak drugog dijela, a upisane su u zapisnik sa utakmice, identitet se utvrđuje za vrijeme odmora između dva dijela igre i neposredno po završetku utakmice.

DELEGAT(ICA) NA UTAKMICI I ZAPISNIK

Član 25.

Delegata(icu) na utakmici u takmičenju Premijer ženske lige BiH i završnice Kupa BiH za žene, određuje Komitet za takmičenje NS/FS BiH sa liste delegatica Premijer ženske lige BiH, Prvih liga NSFBiH i FSRS.

Prava i obaveze delegatice na utakmici na ovom nivou takmičenja, uređena su odredbama Pravilnika o nogometnim/fudbalskim takmičenjima BiH i Propozicijama takmičenja Premijer ženske lige BiH, kao i uputstvima koja donosi Komitet za takmičenje NS/FS BiH.

Delegatica zastupa Komitet i ima vrhovni nadzor na utakmici.

Delegatica na utakmici je obavezna održati radni sastanak (brifing) 60 minuta prije zakazanog početka utakmice i odmah nakon odigrane utakmice unijeti sve podatke o utakmici u COMET sistem, a iste treba sravniti i zaključiti sudija utakmice sa svojom šifrom.

Delegatica utakmice je obavezna odmah po završetku utakmice istu zaključiti putem Fair-playa, a u roku od 24 sati po odigranoj utakmici, sačiniti i zaključiti izvještaj, putem Comet-a, te spiskove igrača podići u Comet sekciju „Dokumenti“, svoga izvještaja.

Komitet donosi posebno Uputstvo o vršenju dužnosti delegata(ica).

Zapisnik sa utakmice se popunjava elektronski, u COMET sistemu. Klubovi su dužni 60 minuta prije početka utakmice dostaviti ovjeren i potpisan spisak igrača i službenika svoje ekipe na propisanom obrascu.

POSMATRAČ SUĐENJA

Član 26.

Posmatrač suđenja određuje Komitet za sudije i suđenje NS/FS BiH.

Posmatrač suđenja daje brojčanu ocjenu suđenja u roku od 48 sati po završetku utakmice.

Izvještaj o suđenju posmatrač suđenja sastavlja prema Uputstvu o ocjenjivanju suđenja, i to u sistemu COMET-a, u roku od 48 sati po odigranoj utakmici.

SUTKINJE / SUCI

Član 27.

Utakmice Premijer lige BiH za žene mogu voditi sutkinje sa liste Premijer ženske lige BiH, koju sastavlja Komitet za sudije i suđenje NS/FS BiH, a po potrebi i sudije sa ostalih stepena takmičenja, čije određivanje vrši Komitet za sudije i suđenje NS/FS BiH.

Član 28.

Nakon određivanja, sudija / sutkinja dobija nalog putem COMET-a od Službe za takmičenje i suđenje NS/FS BiH, u čijem sadržaju mora biti navedeno mjesto, vrijeme i satnica odigravanja utakmice.

Član 29.

Sudija / sutkinja utakmice je dužan / dužna da prije početka utakmice pregleda i odluči da li je teren uslovan za igru. Ako sudija / sutkinja utvrdi da je teren neuslovan za igru, to konstatuje u zapisniku sa utakmice.

ZABRANA NASTUPA ZBOG SUSPENZIJE

Član 30.

Suspendovana ekipa ne može nastupiti na zvaničnoj utakmici sve dok traje suspenzija.

ŽALBE

Član 31.

Žalbe na utakmicu podnose se Komitetu za takmičenje NS/FS BiH koji ih rješava u prvom stepenu.

Žalbe se po svim osnovama moraju najaviti uz obrazloženje, elektronskim putem, telegramski, e-mailom ili faxom koji ima automatski ispis datuma i vremena o najavi žalbe. Najavu žalbe dostaviti u NS/FS BiH u roku od 24 sata po odigranoj utakmici, a pismeno obrazloženje sa dokazom o uplaćenju taksi mora se dostaviti NS/FS BiH u roku od 48 sati po odigranoj utakmici. Za utakmice posljednja dva kola prvenstva, žalbe se najavljuju i dostavljaju u roku od 2 (dva) dana od dana odigravanja utakmice.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi slijedeći radni dan.

Žalba se dostavlja Komitetu putem Službe za takmičenje i suđenje NS/FS BiH.

Uz žalbu se dostavlja dokaz o uplaćenju taksi u skladu sa odlukom IO NS/FS BiH.

Odluke o podnijetim žalbama na utakmice donose se najkasnije u roku od četrnaest (14) dana od dana prijema žalbe, odnosno pet (5) dana ukoliko se radi o žalbi na utakmicu odigranu u posljednja dva kola prvenstva.

TAKSA NA ŽALBU

Član 32.

Iznos takse na žalbu je određen posebnom odlukom IO NS/FS BiH.

Taksa se vraća podnosiocu samo ukoliko se žalba u potpunosti usvoji.

Član 33.

Nenajavljene, neblagovremene ili nedovoljno taksirane žalbe neće biti uzete u postupak, već će biti odbačene, a utakmica će biti registrovana postignutim rezultatom.

Pri ocjeni pravovremenosti žalbe uzima se u obzir datum e-maila, poštanskom žigu preporučenog pisma ili telegrama, datum na faksu potvrdi o žalbi odaslanoj telefaksom ili datum na novčanoj uplatnici.

Član 34.

Žalbe na odluke Komiteta za takmičenje podnose se Apelacionoj komisiji NS/FS BiH u roku od osam (8) dana od prijema pismene odluke.

Za utakmice dva posljednja kola rok za podnošenje žalbe je tri (3) dana. Žalba se podnosi putem Komiteta za takmičenje čija se odluka žalbom pobija.

Odluke o podnijetim žalbama na odluke Komiteta za takmičenje donose se najkasnije u roku od osam (8) dana, a o žalbama podnijetim na utakmice posljednja dva kola u roku od tri (3) dana od dana prijema žalbe.

Žalbe na odluke Disciplinskog komisije podnose se Apelacionoj komisiji u roku od osam (8) dana od prijema pismene odluke.

Protiv odluke Apelacione komisije ne može se uložiti žalba.

Član 35.

U interesu regularnosti takmičenja, organ koji donosi odluke može utvrditi i skraćeni žalbeni postupak.

REGISTRACIJA UTAKMICA

Član 36.

Ako na utakmicu nije uložena žalba, a ne postoje uslovi za registraciju po službenoj dužnosti, utakmicu Komitet registruje postignutim rezultatom.

Ako je prvostepena odluka pravosnažna ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim/fudbalskim takmičenjima NS/FS BiH.

Komitet vrši analizu i registraciju odigranih utakmica na prvom narednom sastanku, a termin održavanja istog utvrđuju u skladu sa članom 9. stav 1 Pravilnika o radu komiteta Izvršnog odbora i pravnih tijela NS/FS BiH.

Izuzetno, Komitet registraciju odigranih utakmica može izvršiti putem e-maila, telefona ili faksa. Verifikaciju registrovanih utakmica vrši Komitet na prvoj narednoj sjednici.

Ako je na utakmicu uložena žalba, rok za registraciju utakmice se produžava do konačne odluke.

DISCIPLINSKE SANKCIJE

Član 37.

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

UTVRĐIVANJE PLASMANA

Član 38.

Plasman klubova na tabeli utvrđuje se prema odredbama člana 43. Pravilnika o nogometnim/fudbalskim takmičenjima NS/FS BiH.

FINANSIJSKE ODREDBE

Član 39.

Prihodi sa prvenstvenih utakmica pripadaju klubu domaćinu.

Klubovi učesnici PŽL BiH su oslobođeni plaćanja troškova kotizacije za učešće u takmičenju.

Troškove angažmana službenih lica na utakmicama PŽL BiH snosi NS/FS BiH iz sredstava UEFA Programa razvoja ženskog nogometa / fudbala. Također, iz istih sredstava, NS/FS BiH će svakom od klubova učesnika takmičenja, a u svrhu podrške organizacije utakmica i funkcionisanja kluba, uplatiti iznos od po 15.000 KM.

U slučaju da se klubovi ne budu pridržavali odredbi ovih Propozicija, ili ostalih odluka NS/FS BiH, NS/FS BiH zadržava pravo da izvrši drugačiju raspodjelu ovih sredstava. Odluku o navedenom donosi IO NS/FS BiH, na prijedlog Službe za takmičenje i suđenje NS/FS BiH.

NAGRADE

Član 40.

Nogometni/Fudbalski savez BiH prvoplasiranoj ekipi Premijer ženske lige BiH dodjeljuje prelazni i pehar u trajno vlasništvo.

Igračima, tehničkom i stručnom rukovodstvu prvoplasiranog kluba dodjeljuje se 35 zlatnih medalja.

Član 41.

Za osvojeno prvo mjesto u fair-playu klubu pripada pehar.

ZAVRŠNE ODREDBE

Član 42.

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 43.

Propozicije stupaju na snagu danom donošenja, a primjenjuju se za takmičarsku sezonu 2023/2024.

P R E D S J E D N I K
Vico Zeljković

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 17.05.2023. godine u Zenici, d o n o s i

PROPOZICIJE
takmičenja završnog dijela Kup-a BiH za žene
za takmičarsku sezonu 2023/2024.

OPŠTE ODREDBE

Član 1.

Ovim Propozicijama utvrđuje se način rukovođenja i organizovanja završnog dijela nogometnog/fudbalskog Kup-a Bosne i Hercegovine za žene u takmičarskoj sezoni 2023/2024.

UČESNICI TAKMIČENJA

Član 2.

U završnom dijelu kupa Bosne i Hercegovine učestvuje 10 (deset) ženskih klubova i to:

- 6 prvoplasiranih klubova iz Premijer ženske lige BiH za sezonu 2022/2023,
- prvoplasirani klub Prve ženske lige NSFBiH za sezonu 2022/2023,
- prvoplasirani klub Prve ženske lige FSRS za sezonu 2022/2023,
- 1 klub is Nogometnog saveza Federacije BiH,
- 1 klub iz Fudbalskog saveza Republike Srpske.

Sve utakmice završnice Kup-a BiH za žene se igraju po jednostrukom kup sistemu, na slijedeći način:

- pretkolo u kojem učestvuju klubovi iz Prvih liga NSFBiH i FSRS (2 kluba) i klubovi koji su postali novi članovi PŽL BiH (2 kluba),
- klubovi pobjednici utakmica u pretkolu, učestvuju sa ostalih 6 ekipa članica PŽL BiH u završnici Kup-a BiH za žene (1/4 finala).

RUKOVOĐENJE I ORGANIZACIJA TAKMIČENJA

Član 3.

Kalendar takmičenja završnice Kup-a BiH za žene donosi Izvršni odbor NS/FS BiH, na prijedlog Komiteta za takmičenje NS/FS BiH.

Takmičenjem rukovodi Komitet, u saradnji sa Službom za takmičenje i suđenje NS/FS BiH.

ŽRIJEB PAROVA KUP-a

Član 4.

Raspored utakmica određuje se žrijebom, kojim rukovodi Komitet. Komitet donosi odluku o modalitetu žrijeba. Odluka Komiteta je konačna.

SLUŽBENA LICA

Član 5.

Komitet i Komitet za sudije i suđenje NS/FS BiH određuje delegatice, posmatrače suđenja i sudije/kinje, u skladu sa Propozicijama Premijer ženske lige BiH.

ORGANIZACIJA UTAKMICA

Član 6.

Organizacija utakmica se vrši prema odredbama Pravilnika o Nogometnim/Fudbalskim takmičenjima NS/FS BiH i Propozicijama završnog dijela Kup-a BiH za žene.

Utakmice su igraju na terenima registrovanim za prvenstvene utakmice klubova učesnika završnice Kup-a.

Organizaciju utakmica vrši klub – domaćin.

Organizaciju finalne utakmice Kup-a BiH vrši Nogometni/Fudbalski savez BiH.

Član 7.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske zastave, zastave županija/kantona, zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 55. Disciplinskog pravilnika NS/FS BiH.

PRAVO NASTUPA

Član 8.

Pravo nastupa na utakmicama završnog dijela Nogometnog/Fudbalskog Kup-a BiH za žene imaju igračice koje ispunjavaju uvjete za nastup koji su propisani Pravilnikom o registraciji, statusu i transferu igrača NS/FS BiH, Propozicijama o takmičenju Premijer ženske lige BiH, kao i uredno evidentiranim ljekarskim pregledom, unesenim u Comet.

Ukoliko neka od ekipa nema u zapisniku utakmice prijavljenih najmanje 15 (petnaest) igračica, onda ista snosi takmičarske i disciplinske posljedice.

UTVRĐIVANJE PLASMANA

Član 9.

Ukoliko utakmica završi neriješenim rezultatom, pobjednik se dobija izvođenjem udaraca sa tačke kaznenog udarca za dobijanje pobjednika na utakmici, prema Pravilima nogometne/fudbalske igre.

U četvrtfinalu, polufinalu i finalu se igra jedna utakmica, finalna utakmica igra se u mjestu koje odredi NS/FS BiH, koji je i organizator iste. Ukoliko je nakon isteka regularnog vremena neriješen rezultat, pobjednik se dobija izvođenjem udaraca sa tačke kaznenog udarca za dobijanje pobjednika na utakmici.

Član 10.

Ukoliko klub, nakon obavljenog žrijeba takmičarskih brojeva, svojom krivicom odustane od Kup takmičenja, ili neopravdano ne dođe na odigravanje utakmice, u dalje takmičenje će se plasirati protivnički klub.

Klub koji neopravdano odustane od Kup takmičenja ili neopravdano ne dođe na odigravanje utakmice, snosit će disciplinske posljedice u skladu sa odredbama Disciplinskog pravilnika NS/FS BiH.

FINANSIJSKE ODREDBE

Član 14.

Troškove službenih lica (taksi i putnih troškova) snosi NS/FS BIH.

NAGRADE

Član 15.

Pobjednik kupa Bosne i Hercegovine za žene dobiva prelazni pehar i pehar u trajno vlasništvo, a igračice, tehničko i stručno rukovodstvo 30 (trideset) zlatnih medalja.

Igračice, tehničko i stručno rukovodstvo drugog finaliste dobivaju 30 (trideset) srebrenih medalja. Službena lica (sudije, posmatrač suđenja i delegat) dobivaju 6 (šest) medalja.

Klubovima finalistima Kup-a pripada i novčana nagrada, i to:

- 8.000,00 KM (osam hiljada konvertibilnih maraka) za pobjednika Kup-a;
- 4.000,00 KM (četiri hiljade konvertibilnih maraka) za finalistu Kup-a.

ZAVRŠNE ODREDBE

Član 16.

Za sva ostala pitanja koja nisu predviđena ovim Propozicijama važe odredbe Pravilnika o nogometnim/fudbalskim takmičenjima NS/FS BiH i drugih propisa NS/FS BiH, FIFA-e i UEFA-e.

Član 17.

Propozicije stupaju na snagu danom donošenja, a primjenjuju se za takmičarsku sezonu 2023/2024.

P R E D S J E D N I K
Vico Zeljković



NOGOMETNI/FUDBALSKI SAVEZ BIH

Broj: 02 - 1693 - 2e/23.
Sarajevo, 17.05.2023. godine

Izvršni odbor Nogometnog/Fudbalskog saveza Bosne i Hercegovine, na osnovu člana 35. Statuta Nogometnog/Fudbalskog saveza BiH, na prijedlog Komiteta za takmičenje NS/FS BiH, na sjednici održanoj u Zenici 17.05.2023. godine, d o n o s i

O D L U K U **o Kalendaru takmičenja Premijer ženske lige BiH – seniorke i Kup-a BiH za žene** **takmičarska sezona 2023/24.**

JESENJI DIO

August/ Kolovoz	19/20.08.2023.	1. kolo PŽL BiH	17:00	
	26/27.08.2023.	2. kolo PŽL BiH	17:00	
Septembar/ Rujan	02/03.09.2023	3. kolo PŽL BiH	16:30	
	09/10.09.2023.	4. kolo PŽL BiH	16:30	
	16/17.09.2023.	5. kolo PŽL BiH	16:30	
	18.09. - 26.09.2023.	INTERNACIONALNI TERMIN		
	30.09./01.10.2023.	6. kolo PŽL BiH	16:00	
Oktobar/ Listopad	07/08.10.2023.	7. kolo PŽL BiH	15:30	
	14/15.10.2023.	8. kolo PŽL BiH	15:00	
	21/22.10.2023.	9. kolo PŽL BiH	15:00	
	23.10. - 01.11.2023	INTERNACIONALNI TERMIN		
Novembar/ Studen	04/05.11.2023.	10. kolo PŽL BiH	14:30	
	11/12.11.2023.	11. kolo PŽL BiH	14:30	
	27.11. - 06.12.2023	INTERNACIONALNI TERMIN		

PROLJETNI DIO

Mart/ Ožujak	16/17.03.2024.	12. kolo PŽL BiH	15:00	
	20.03.2024.	Pretkolo Kup-a BiH za žene	15:00	
	23/24.03.2024.	13. kolo PŽL BiH	15:00	
	27.03.2024.	¼ Finale Kup BiH za žene	15:30	
	30.03.2024.	14. kolo PŽL BiH	15:30	
April/ Travanj	01.-09.04.2024.	INTERNACIONALNI TERMIN		
	13/14.04.2024.	1. kolo Liga za prvaka PŽL BiH 1. kolo Liga za opstanak PŽL BiH	16:30	
	20/21.04.2024.	2. kolo Liga za prvaka PŽL BiH 2. kolo Liga za opstanak PŽL BiH	16:30	
	24.04.2024.	½ Finale Kup BiH za žene	16:30	
	27/28.04.2024.	3. kolo Liga za prvaka PŽL BiH 3. kolo Liga za opstanak PŽL BiH	16:30	
Maj/ Svibanj	04/05.05.2024	4. kolo Liga za prvaka PŽL BiH 4. kolo Liga za opstanak PŽL BiH	17:00	
	11.05.2024.	5. kolo Liga za prvaka PŽL BiH 5. kolo Liga za opstanak PŽL BiH	17:00	
	18.05.2024.	6. kolo Liga za prvaka PŽL BiH 6. kolo Liga za opstanak PŽL BiH	17:00	
	22.05.2024.	Finale Kup - a BiH za žene	17:00	

P R E D S J E D N I K**Vico Zeljković**